



Parke Nacional Arikok ta percursa pa mas innovacion y informacion

Cera conoci cu e prome 'Lespakket' den formato digital




ORANJESTAD (AAN):

Recientemente Parke Nacional Arikok a introduci un proyecto hopi innovativo cu sigur tur scol basico por haci uso di dje pa duna les den un formato digital. Esaki ta den cuadro di e rol cu Parke Nacional Arikok ta hungando for di su establecimiento caba na aña 2000, den cuadro di promocion y proteccion di nos flora y fauna.

Manera ta conoci, e mundo tecnologico ta trece cune hopi cambio y awor e muchanan ta hopi interesa den tecnologia y internet. Cu esaki, Parke Nacional Arikok a introduci su prome Lespakket 'Onze veelzijdigedicinaleplanten' den un formato digital, pa uzo na scol basico.

E departamento educativo



di Fundacion Parke Nacional Arikok a traha riba e produccion cu ta consisti di 'Guia di maestro', 'Buki di alumno', 'Quiz' y material extra.

Fundacion Parke Arikok ta informa publico, maestro y muchanan pa nan cera conoci cu e website den temporada di vakantie. Riba e website aki por haya hopi informacion ya sea pa presentacion y/of "spreekbeurt" na scol.

Parke Nacional Arikok ta conscientisa nos hobennan atravez di diferente material tocante nos flora y fauna. Banda di esaki tambe kier informa nos hobennan di e aspecto cultural di Aruba su flora.

Bishita e website di Fundacion Parke Nacional Arikok: <http://www.arubanationalpark.org/>. E link pa download e

pakete digital aki ta bou di e seccion: EDUCATION/ EDUCATION FOR SCHOOLS/Lesson packages. E "Lespakket" ta na idioma Hulandes manera nos sistema di educacion ta rekeri.

Parke Nacional Arikok ta existi desde aña 2000 caba, ta maneha 34 km² di tereno, ta conta cu 48 empleado den servicio y anualmente ta ricibi bishita di mas o menos 200 mil persona. Diariamente tin entre 80 pa 100 bishitante den e park, di cual mayoria ta turista pero den fin di siman nos local nan ta resalta. E sitionan mas bishita den Parke Nacional Arikok ta Conchi (Natural Pool), Grot di Fontein y Boca Prins. Asina mes tin mas atraccion den e park, manera Grot di Guadirikiri, Dos Playa y sin lubida Cunucu di Arikok.